

P'ous pechadés de la haute bat d'Aspe, decap Bernère e Estaëns, lous aulhès aspoès que hasèn pèche lous lous troupèts... Mes que y abè û escabot tiengut à descus per lous auts, oun ne y abè que triste mounde, proumtes à ha deu mau e mechantè. Per la horce e desaguis, qu'abèn cassat lous àutes pastous déus milhous prats d'Estaëns : mantûs òmis e bèsties qu'at abèn pagat de la loue bite. Û die deu 24 de jun, decap au seré, û mechant auràtye que-s lhebè, las brumes baches que hoeyèben, pressades, agarbades peus soums d'Aspe, de Bisaurin e de Baralet, coum las lâs de las aulhes per lous brocs deus plèchs. Arré ne mancabe : eslambrecs, tounèrre, e lous aulhès que s'èren hicats au soubac, las aulhes pauraques que s'amassaben à l'assès. Bestia, cabales, touts que cercaben a-s para. Lous praubes cagnots, esclaves dou debé, que belhaben encoère, en tremoulan.

La bendoulère que segoutibe las clédes, cledous e portes, e, à û pous, la porte dou cuyala oun s'èren amassats lous machans pastous que-s auri toute grane. Û òmi que-s tienè sus la pèyre de sòu. Qu'ère bielh, péu loung, grane barbe, mau bestit. Que tienè û barrot, e ue biasse, hort flouche, que penè à soue espalle. Aus pès, de tristes espartegnes de mounye. Més la soue care qu'abè quauqu'arré de mayestuous ; dens soûs oelhs, ue douçou e ue bountat qui n'èren pas ourdenàris. Que saluda en aquestes tèrmis : « *pats sus bous auts, pastous de la mountagne ! Au praube bielh dat arrecàpte, per la noéyt qui cad. Que sera acessat de drin de pâ. Que serat remerciats. E si-s pod, de drin de lèyt, que p'en saberèy grat !* »